

## Ho hapilwe disakarete tse seng molaong, kwae ya peipi ya *hookah* mmoho le tshepe tsa sekerepe tsa boleng ba R40 million

**Tshwane, 10 Tshitwe 2021** – Lekala la Bolaodi ba Thepa Meeding la Ditshebeletso tsa Lekgetho tsa Afrika Borwa (SARS), ka tshebediso ya mekgwatshebetso ya sekwalelwale ya ho fokisa tse ka bakang kotsi mmoho le ho sebetsa mmoho le diakgente tse ding tsa phethahatso ya molao, le hapile disakarete tse seng molaong, kwae ya peipi ya *hookah* mmoho le tshepe tsa sekerepe tse neng di ka baka nonyetso ya lekgetho ya boleng ba paloyohle ya R40 million.

Disakarete tsena tse seng molaong, di ile tsa fumanwa mane boemakepeng ba Durban, mme boleng ba tsona ke R35-million, mme mane Polokwane, boleng ba tsona ke R3-million. Moqeqeko wa tshepe ya sekerepe wa boleng ba R160 000 le ona o ile wa hapuwa ke Bolaodi ba Meedi mane Polokwane.

Ke mabokose a 432 a kwae ya peipi ya *hookah*, ya boleng ba R 2-million, a ileng a fokiswa mane City Deep mme ona a ne a tsebahaditswe e le dimolase tsa tshekere tse neng di tla romelwa mane naheng ya Malawi. Le ha ho le jwalo, ho ile ha fumanwa lesedi la hore maikemisetso ka kwae ena ke hore e phatlalatswe mmarakeng wa lehae.

Diyuniti tsa Bolaodi ba Meedi tsa SARS mmoho le dikarolo tsa Kgwebisano e seng Molaong di entse letsholo lena ka tshehetso ya Ditshebeletso tsa Sepolesa sa Afrika Borwa (SAPS) mmoho le Diphuputso tsa Bonokwane ba Mantlha (Hawks).

Ho hapuwa ha disakarete tse seng molaong mane boemakepeng ba Durban ho etsahetse ka mora hore SARS e sebedise mekgwatshebetso wa sekwalelwale wa ho batla tse ka bakang kotsi le ho hlwaya meqeqeko e tlišwang ka ha ra naha ke disenyi tse dulang di etsa jwalo kgafetsa. Meqeqeko ena e ile ya tsebahatswa ka mokgwa o fosahetseng wa hore ke dikopi tsa seramiki mmoho le theipi e kgomarelang.

Meqeqeko ena e ne e kentse dikhontaina tse tharo tse neng di patile makase a sehlooho a 1800 a disakarete tsa RG mmoho le makase a sehlooho a 1245 a mefuta ya matjhabeng e sa ngodisetswang ho ka rekiswa mona Afrika Borwa.

Mane Polokwane, SAPS e kgaolelitse teraka ya disakarete mme ya tsebisa bahlanka ba SARS. Yuniti ya Kgwebisano e seng Molaong ya SARS e ile ya phenya teraka ena mme ya fumana mabokose a 276 a disakarete tsa Remington Gold tse se nang setempe sa taemane, tsa boleng ba R3-million.

Ka hara teraka ena, bahlanka ba boetse ba fumana moqeqeko wa tshepe tsa sekerepe tsa boleng ba Bolaodi ba Meedi ba R160 000. Teraka ena e kene ka hara naha ka lediboho la Beit Bridge. Ho tshwerwe babelaelwa ba bane

Khomishenara ya SARS Edward Kieswetter o boletse hore ba etsang thomelohare le thomelontle ya dihlahiswa tse seng molaong ba lokela ho hlokomela hore SARS e

sebedisa mekgwatshebetso ya sekwalekwale ho fokisa tse ka bakang kotsi le ho hlwaya morwalo e belaetsang.

“Tshebediso ya tekhnoloji ya morao tjena, *data* e kgolo, manollo ya dipalopalo le boithuto ba metjhine ho fokisa le ho thibela ho se ikobele tefo ya lekgetho ke e nngwe ya maikemisetso a rona a mawala mme sena se bapile le sepheo sa rona sa ho aha SARS e ratwang le e tshepuwang. Re tsitlallela boikobelo ka boithaopo empa re tla sebetsana ka tsela e thata le diketso tsa ho se ikobele le tsa bonokwane,” ho rialo Mong. Kieswetter.

Ho fumana lesedi le fetang lena, ikopanye le [Sarsmedia@sars.gov.za](mailto:Sarsmedia@sars.gov.za)